

防  
河  
奏  
議

防河奏議目次

卷三

恭報起程到任日期

續留効力人員

建築諸望壩埽工

恭報秋汛平穩

蘭陽南岸天然自開引河

酌定運河夫役工食

添設豫省河營守備

孟縣主簿應歸河缺

堡房造人交代

開挑荊隆口對岸引河

幫築祥陳二汛臨河月堤

加修程家寨埽工

防河奏議卷三

李太僕奏為事部督理河南河道總督事務加級臣附呈

恭報起程到任日期

題為恭報微臣到任日期仰祈

睿鑒事竊臣於雍正七年三月初二日准吏部咨

欽蒙

皇上洪恩授臣為總督河南山東河道提督軍務

欽此臣隨具疏恭謝

天恩訖又於本月二十二日准吏部咨奉

上諭嵇曾筠向來但管山東河南之黃河今既授  
爲山東河南河道總督着將山東境內之運河  
交與嵇曾筠一併管轄欽此欽遵伏思東省運  
河乃漕艘經由要地目下重運遄行一應疏  
濬催儻諸事最關緊要亟宜前往查察除一  
面移咨江南河臣查取運河案卷外臣隨於  
雍正七年三月二十五日由河南儀封縣北  
岸工次起程沿途查勘堤埽要工卽前赴山  
東濟寧州總河衙門於雍正七年四月初二

日到任訖至一切應行事宜容臣逐一清查  
次第舉行惟有竭盡駑駘悉心整理以仰報  
皇上簡任洪恩於萬一耳所有微臣到任日期理  
合恭疏

題報伏乞

皇上睿鑒施行雍正七年四月初二日

題奉

旨該部知道欽此

續留効力人員

題爲循例

題明仰祈

睿鑒事竊惟河工務在得人而人才尤貴諳練

臣

以菲材仰蒙

皇上天恩畀以副總河之職管理豫省河務工長  
汎遠一應奔走往來需人委用曾經具

題請

旨收錄効力人員范昌治等五十六名以供驅策

後因

題補委署及緣事回籍等情除去二十九人止  
存二十七人在工効力每遇汎水漲發差遣  
之處甚多實不敷用又續收王定成等二十  
五人復經

題明在案今蒙

聖恩高厚授

臣

爲總督河東河道兼管運河伏念

豫東二省黃運兩河千有餘里其間工程遙  
遠河務殷繁更須差遣多人往來照應方資



防護查雍正六年 臣續

題効力人員一疏有行文本籍地方取具身家  
殷實印結未經送到者概不列名今據各地  
方官陸續結送前來有候選州同杜宮聲等  
十一名 臣向經差遣俱係年力強幹堪供驅  
策之員合無仰懇

皇上洪恩俯念黃運二河需人孔亟准其一體留  
工効力則伊等各知上進有階自能奮勉從  
事而 臣亦得收臂指之助矣再查候選知縣

蔣祈年原係鑲藍旗漢軍白慈存佐領下人  
於雍正五年二月內到工學習河務不辭辛  
苦最爲勤慎今已熟諳工程但該旗都統移  
送並無假冒過犯等情印結前來查無殷實  
字樣理應欽遵

上諭將該員咨回吏部另行奏

聞恭候

睿裁合併聲明除現在造具各員履歷功績清冊  
并取到原籍印結送部存案外

臣謹遵例

題明伏乞

皇上睿鑒勅部議覆施行雍正七年五月初二日  
題奉

旨該部議奏欽此

建築諸望壩埽工

題爲亟請下埽鑲護堵截支河圈築裏月堤工  
以禦頂衝以資保固事該臣等會看得單縣  
諸望壩臨河大堤坐當河勢北灣素稱險要  
緣上年南岸淤出沙灘全黃大溜直逼北崖  
頂衝塌卸危險堪虞經臣親詣確勘相度形  
勢亟應僱下護埽樓崖外邁沉水大埽上加  
套掃鑲墊高寬簽椿堅實逼溜開行并將壩  
工下游舊有支河建築土壩二道使水不致

注入再於壩後圈築小月堤一道以資重障  
今據兗寧道副使呂維炳詳稱查諸望壩下  
埽三路普而加鑲工長八十丈共估工料實  
銀一萬一千二百三十一兩九錢六分零又  
建築支河壩并圈築月堤共工長一百六十  
三丈共估土方實銀六百一十五兩八錢四  
分通共實估工料土方銀一萬一千九百四  
十七兩八錢零委無浮冒因該工關係緊要  
於上年冬間詳蒙動支曹縣庫存雍正五年

分停工徭夫工食并幫貼銀兩分發償辦料  
物乘時興修建築以資保護擬合造冊詳請  
會核

題估等情前來臣等確勘復核無異除將原冊  
送部查核外相應會同署江南河臣尹繼善  
河東督臣田文鏡署山東撫臣費金吾合詞  
具疏

題估伏乞

皇上睿鑒勅部議覆施行雍正七年六月二十七日

題奉

旨該部議奏欽此部議准行雍正七年閏七月初

六日奉

旨依議欽此

恭報秋汛平穩

奏爲秋汛已竣恭報水勢工程平穩情形仰慰  
聖懷事竊惟豫東二省黃河自入伏以來我

皇上睿慮周詳特頒

諭旨恐夏末秋初雨水過多河工堤岸之敬慎防

範更當加倍寅畏以從事臣等凜愼欽遵倍

切小心所有南北兩岸應行修守之處時時

嚴飭道廳汛弁督率兵夫將土埽工程增加

寬厚茲於八月初旬因大雨積水黃沁又復



加長至初七初八等日接連異漲掃灣迎溜之處長至七尺八尺不等緣從前汎水尙未全消而天雨連日山陝兩省伊洛瀝澗丹沁諸水滙入黃河並漲遂致平漫出漕一派汪洋直至堤根全賴兩岸堤工堅厚埽壩防風俱各鑲築高寬足資捍禦所以此番水長雖消落稽遲連日浸泡而工程穩固不致疎虞間有臨河月堤逼近黃流水勢騰湧沿灘而上所恃料物充足兵夫齊集曉夜搶護並無

貽悞查六月望前臣等欽奉

上諭敬慎防範隨經到處宣揚嚴飭欽遵屆此異常漲水兩岸員弁兵夫暨濱河父老無不仰服我

皇上幾先遠見若燭照數計纖毫不爽而臣等更感我

皇上訓旨預頒誥誨諄諄所以先事圖維俾得保衛蒼生各安衽席廩倉儲蓄間并熙恬不勝額手慶幸也抑更有奇驗者如豫省三家莊

原爲首險工程黃流自南而北久成頂衝之勢以致長椿大埽刻刻加修兵夫員弁奔走不遑上年曾蒙

聖諭於對岸沙灘相機開挖引河導水東流

臣等

細加審視因係曠衍平灘河頭無吸川之形河尾無建瓴之勢所以未敢輕舉倘河勢稍有遷移卽當乘時開挖乃此番長水之後南北兩岸沿堤掣溜之河身俱爲淤斷而對岸大灘之內倏汕深渠中流直瀉成河竟至大

溜離三家莊壩臺約有數百丈之遠竊思開  
挖引河非千萬人夫不能趨事亦非盈萬帑  
金不能興作今中間自汕河泓奔騰浩瀚百  
日之工成於一旦三家莊埽壩俱現淤灘化  
險爲平藉非

神力何能至此雖水勢直注東省芝蔴莊固屬  
險要但以修防全力保護一工實可無兼顧  
之憂而得有專成之效較之險生兩地彼此  
分心其爲勞逸不啻倍蓰皆由我

皇上愛育黎元奠安河岳

聖心誠敬上格於

天所以水土治平下孚於地

臣

等往來河畔目擊情

形驚喜之至愈生寅畏服膺

聖訓更加敬慎謹爲據實奏

聞仰慰

聖懷伏祈

皇上睿鑒雍正七年八月二十四日

奏奉

古嵇會筠著交部議敘其在工人員著嵇會筠分別等次送部議敘欽此經部議覆雍正七年十一月十四日奉

旨嵇會筠著加一級田文鏡總督河東河工事務雖非專責然年來與嵇會筠同寅協恭悉心料理是以堤工完固共慶安瀾田文鏡亦著加一級餘依議欽此

蘭陽南岸天然自開引河

題爲報明蘭陽河勢取直天然新闢引河順流  
東注事該臣等會看得黃河灣曲之處取直  
順行堤工卽可化險爲平運道民生胥受其  
福我

皇上愛育黎元勤求治理誠敬感孚懷柔河岳如  
儀封縣北岸三家莊埽壩工程本年八月初  
旬汎水長發於對面大灘之內自汕引河水  
勢順行百日之功成於一旦臣等已將工程

平穩情形敬謹

奏明在案今蘭陽縣南岸耿家水口自銅瓦廂  
以下朱家寨之北河勢取直東西埤透不煩  
畚插之勞天然自汕引河一道中泓暢達直  
趨而下又復化險爲平竊思豫省要工若蘭  
陽縣之四水口河勢兜灣大灘橫亘約有數  
十餘里如挑挖引河導水東流工大費繁經  
時累月今乃自爲開闢中泓取直循軌順流  
與三家莊新汕引河一月之間兩呈奇驗人



力不勞成功迅速不特兩岸險工俱臻平穩  
而沿堤灘地亦得廣爲耕耨皆由我

皇上軫念河防深仁育物所以平成底績屢著

神庥益信

上蒼之昭格舉念可通

聖德之精純至誠普應臣等愈凜小心彌深忻忭

謹會同河東督臣田文鏡合詞具

題伏乞

皇上睿鑒施行雍正七年十月初八日

題奉

旨據嵇曾筠等奏稱蘭陽縣耿家水口銅瓦廂以下朱家寨之北自汕引河一道中泓暢達化險爲平與三家莊新汕引河一月之間兩呈奇驗等語前因三家莊大灘之內自汕深渠朕感念河神默佑福庇吾民已降特旨諭令河臣虔敬致祭以申謝悃今又蒙顯賜靈應着將蘭陽縣自汕引河之處一併敘入祭文之內該部知道欽此

酌定運河夫役工食

題爲酌定運河夫役工食銀兩去浮冒以收實  
效事竊查東省運河上自德州交界起下至  
江南邳州交界止計長一千一百餘里爲漕  
艘經由要地所以運河捕河泲河東昌上下  
河五廳額設淺溜橋閘等項長大共計三千  
三百三十三名歲支工食銀三萬二千二百  
四十兩九錢六分零遇閘加增在於各州縣  
地丁項下動用報銷冬春小挑不敷力作則

於長夫之外添設酌補夫一千四百二十一名間年大挑則於酌補之外又加募夫五千四百七十名所需工食因各縣夫役遠涉爲勞舊例按畝輸錢名曰幫貼小挑之年共計幫貼銀四萬四千一百五十七兩三錢八分零大挑之年共計幫貼銀六萬二千六百八十三兩二錢四分零此酌補加募之由總因運河水勢靡定水小則流緩沙停水大則噴沙淤積是以大挑小挑乃係運河一定之工

程長夫募夫均係河工必需之力作况力役  
乃小民分內之事而幫貼則免其遠涉之勞  
惟當察除額外之浮費不便議減舊有之成  
規寧留有餘以備不虞無致臨期而或束手  
所需幫貼一項仍照舊例徵收臣等留心體  
察不許各該州縣多派濫徵廳汛員役短扣  
管銷外惟是各夫工食有舊額多寡不同而  
慣夫積役有包攬虛冒等弊甚有已支工食  
而重索幫貼者其應添跨夫應用器具又令

長夫自行雇覓購辦者不但影射侵漁冒銷分蝕難以究詰抑且同一夫役而工食互異苦樂不均今擬按其力作通盤核算酌定工食以爲常則

請將淺溜軍橋徭壩等夫每名歲給工食銀一十二兩量給器具銀八錢閘夫啟閉辛勤每名歲給工食銀一十四兩四錢量給器具銀八錢兵夫仍照兵餉之例每名歲給工食銀一十四兩六錢四分亦量給器具銀八錢以

上各夫共需銀四萬六千五百六十四兩六錢七分零除各州縣額編工食銀三萬二千二百四十兩九錢六分零外其不敷銀一萬四千三百二十三兩七錢零在於幫貼項下照數找足遇閏加增至於酌募等夫自築壩戽水以至起壩放水內有需工三十日以至六十日者此乃暫時募用與長養之夫不同且時當近寒力作亦苦應每日量給工價銀六分每名量給器具銀二錢亦於幫貼項下

照數支給仍令各該濱河州縣僱募交發河  
員將到工名數冊報道廳轉報臣衙門卽遴  
選幹員分投查點務使名名著實按工計夫  
按夫給價則因地制宜工程既有定限分查  
總核夫役亦難虛冒其節省銀兩俱令解交  
運河廳庫報明存貯以爲河工緊要工程之  
需臨時仍

題明動用報部查核至於水勢有大小淤沙有  
厚薄酌補募夫多寡原難預定設有應添應



減之處臨期責令道廳據實詳報以憑酌核  
務期無悞運行所有一應夫工確數盈餘銀  
兩統於冬春挑河竣事後並等核實

題明另造清冊咨部備案如有扣剋短發妄肆  
侵漁或捏少報多希圖浮冒或於幫貼之外  
另立名色再爲科派臣等卽據實糾叅嚴加  
治罪庶帑不虛糜工收實效夫食無偏枯徵  
輸有定額運道民生均資裨益矣再查泐河  
廳屬有新建閘夫三十名下河廳屬有軍夫

六十名橋夫二名均係例不協挑塘河共工  
食銀七百五十九兩八錢零又捕河廳屬壽  
張縣臨時協濟夫五十五名清河縣臨時協  
濟夫一十二名共工食銀八十七兩九錢零  
均可毋庸另議增減仍令照常支給外臣等  
謹會同河東督臣田文鏡署山東撫臣費金  
吾合詞恭疏具

題伏乞

皇上睿鑒勅部議覆施行雍正七年十月初八日

題奉

旨該部議奏欽此部議准行雍正七年十二月初

七日奉

旨依議欽此

添設豫省河營守備

題爲請

昔事雍正七年閏七月二十日准兵部咨開職方  
清吏司案呈兵科抄出本部題前事內開議  
得河南山東河道總督嵇曾筠疏稱懷河營  
千總王經文歷俸年滿例應開缺但汛內有  
經管武陟秦家厰馬營等處埽壩工程全賴  
修守得人今已俸滿可否授以守備職銜仍  
管懷河千總汛務等因具

題奉

旨王經文著照該督所請准授守備職銜仍管懷  
河千總汛務豫省河營從前原未設有守備之  
缺着兵部酌議添設守備幾缺以爲武弁効力  
河工者上進之階該部知道欽此除俸滿千總  
王經文已奉

旨准授守備職銜仍管懷河千總汛務行文該督  
欽遵外查豫省河營南北兩岸原設千總四  
員把總四員並未設有守備員缺所以千總

內卽有熟悉椿埽勤敏盡職之員每無陞用之路今欽奉

俞旨令臣等酌議添設守備幾缺爲武弁効力河工上進之階此誠我

皇上軫念河工鼓勵人材之至意臣等遵

旨酌議擬於豫省懷豫兩河營內添設守備二員將一應堤工修築事宜令其督率千把總晝夜防護其所添守備員缺有專司河務之責應令該督將河營千總內在工年久熟悉河

務諳練椿埽勤勞素著之員揀選題補照例  
送部引

見應給守備關防俟該督將分管事宜擬定營制  
到日移咨禮部鑄給可也等因雍正七年閏  
七月初七日題本月初九日奉

旨依議欽此抄出到部爲此合咨前去欽遵施行  
等因移咨到臣欽此欽遵該臣看得河南黃  
河南北兩岸蒙

皇上飭部議添守備二員令臣將河營千總內在

工年久熟悉河務諳練椿埽勤勞素著之員  
揀選

題補仰見我

皇上軫念河工鼓勵人材之至意伏查河南懷河  
營千總王經文前因該員歷俸年滿例應開  
缺但汛內有經管武陟秦家廠馬營等處埽  
壩工程全賴修守得人經臣將王經文以守  
備職銜仍管千總汛務具

題請



旨已蒙

皇上俞允授以守備職銜今河南懷河營黃河北岸應添守備一員仰懇

天恩卽將王經文補授實屬銜缺相當再有河南

黃河南岸應添守備一員

臣

於河營現任千

總內細加遴選查有山東芝蔴莊汛千總焦  
夔昌熟悉河務諳練椿埽在工年久實係勤  
勞素著之員仰懇

聖恩准其補授洵屬人地相宜修防有賴而該弁

等感沐

天恩自能益加鼓勵矣再查河營千總惟以諳練  
椿埽爲重其於弓馬原非所長今王經文焦  
鑒昌二員原係河兵出身力役工程俱各三  
十餘年一切修守機宜皆所慣習而弓馬騎  
射原未嫻熟合併聲明除將懷豫兩河營添  
設守備二員營制事宜移咨兵部請

旨遵行外謹將王經文焦鑒昌二員履歷造冊送  
部查核並給咨該員等隨本赴部聽候引

見臣謹恭疏具

題伏乞

皇上睿鑒勅部議覆施行雍正七年十一月初八

日

題奉

旨王經文着補授河南懷河營守備焦夔昌着補授河南豫河營守備欽此

孟縣主簿應歸河缺

題爲黃河上游河員緊要恭請揀選

題補以固修防以收實效事竊惟豫省河工仰蒙我

皇上愛育黎元慎重河防不惜百萬帑金加幫兩岸堤工遞年以來工程鞏固共慶安瀾沿河億萬蒼生疊逢稔歲儲蓄豐盈久已安居樂土咸登衽席矣惟是全河形勢下游之去路旣已順軌安流上游之門戶尤須周詳慎固

查黃河自三門七津建瓴而下南岸有北却  
廣武一帶山岡高阜足資捍禦北岸則爲溫  
孟二縣地形平坦土性虛鬆容易汕刷向來  
孟縣沿河地方險要之處俱有民堤以爲護  
衛例係民築民修但須董率有方小民始克  
急公趨事其一應修守機宜尤須熟練河務  
之員勤加相度如式修防方無貽悞除勸諭  
民夫鳩工修築仍令印官循照舊例加謹辦  
理外所有孟縣管河主簿一員向由部選誠

恐不諳修防致滋貽悞似應循例請

旨選員

題補專司修守之責仍令該員駐劄孟縣堤工兼理溫縣河務其武汛修防事宜交懷河營千總管理并酌量派撥河兵在於孟縣堤工防守仍飭懷河同知守備不時巡查庶上游之門戶修理周密則下游之去路愈加平順全河水勢振衣挈領工不煩而效更遠運道民生均有裨益矣

臣

等謹會同河東督臣田

文鏡合詞恭疏具

題伏乞

皇上睿鑒勅部議覆施行雍正八年正月二十四

日

題奉

旨該部議奏欽此部議准行雍正八年三月二十

二日奉

旨依議欽此

堡房造入交代

題爲堤岸堡房上動

國帑下資河防關係匪輕詳請飭入交代以定  
考成事該<sub>臣</sub>等會看得豫省黃河南北兩岸  
大堤並月格等堤經<sub>臣</sub>先後條

奏建蓋堡房共五百一十二座俱蒙

皇上恩允動用司庫節省銀兩令臨河各州縣修  
蓋如式造冊

題銷在案惟是防守堤岸全恃兵夫而兵夫寢



食惟藉堡房第恐間有損壞必須隨時修整  
堅固方可棲息前據河北守道朱藻詳以堡  
房照倉廩交代之例造入交代冊內同廩座  
一例交盤如有損壞不修照例議處等情當  
經臣等批令管河道會同布政司妥議詳奪  
去後嗣據署河南布政司事按察使陳世倅  
管河道副使祝兆鵬詳稱會查得堤工全恃  
兵夫以修防而兵夫惟賴堡房爲棲止堡房  
完固俾得在內存身庶可朝修而夕守至臨

河州縣雖各仰體軫念河防撫恤下役之德  
意時加修葺不致滲漏頽圯然章程不定則  
責守不專北道所議固益河防但倉厩乃糧  
儲攸繫堡房爲兵夫所棲立意雖無二致輕  
重自有不同未便一律而論者也查河工錢  
糧已於雍正四年奉准部覆照依倉庫錢糧  
定限兩月交代遵照在案再查定例內開官  
員修造砲臺邊界烽墩等項不速行修造完  
結遲延者降職一級修完之日還其所降之

級不催之上司罰俸一年等語今議將堡房如遇州縣官陞遷事故令其造入工程錢糧項下交代接任官親詣堤工驗明完固造冊具結申送河廳核明加結轉呈如有破壞者接任官卽行揭報轉請咨叅比照砲臺邊界烽墩等項不修例議處着令前官賠修完日開復如該管之廳員徇縱不加督察者經道揭報照不催上司例議處如接任官因循接受卽着接受之員賠修如堡房完固接任官

故意指勒照新舊交代前官已將錢糧徹底  
清白造冊交代而新官推諉不接者罰俸一  
年例議處如是則臨河地方各官咸知警惕  
時加修葺兵夫旣得所棲河防更有攸賴等  
情當經臣等會同督臣田文鏡咨明工部在  
案今准部覆應令具題到日再議等因相應  
會同督臣田文鏡合詞恭疏具

題伏乞

皇上睿鑒勅部議覆施行雍正八年正月二十九

曰

題奉

旨該部議奏欽此部議准行雍正八年四月十四

日奉

旨依議欽此

開挑荆隆口對岸引河

題爲亟請開挑引河以順水性以保險要堤工  
事該臣等會看得黃河北岸封邱縣荆隆口  
素稱險要近因黃流北趨南岸淤灘日漸增  
長河勢從黑堽口而下自南至北三十餘里  
大溜頂衝直注荆隆口奔騰浩瀚勢若建瓴  
衝塌河崖離大堤僅五六十丈不等一帶堤  
埽工程俱關吃緊密邇運道尤須先事預防  
前據該道廳詳請脩料建築埽壩防風並加

幫裏戩以資捍禦經臣批飭多貯料物僨幫  
戩堤相機加謹修守在案茲查該工乃舊時  
決口與古黃池緊接內臨深潭形同釜底外  
當頂衝大溜直射今籌畫萬全必須於荆隆  
口對岸開挖引河一道導水東行以爲一勞  
永逸萬年鞏固之計經臣親至該工乘舟上  
下細加查看南岸河勢從黑堽口直注而北  
荆隆口正值頂衝由古黃池繞灣南向至柳  
園口迤東曲折紆迴激流湍湧若於從中避

灣就直引溜順行甚爲利便況今黑堽口迤  
下大灘掃溜之處正在塌壓已經刷成兜灣  
天然自立河頭大有吸川之形其下游之柳  
園口自高而卑現有坐灣應在陡厓處所安  
置河尾更得建瓴噴瀉之勢形勢旣成急宜  
乘機開挖引河一道俾水勢順趨大溜直注  
中泓不特荆隆口險工可保無虞卽古黃池  
一帶要工均得久安穩固運道民生實有裨  
益查引河頭自黑堽口迤下至柳園口陡厓



河尾止計工長三千三百五十丈共計土三十四萬四千七百三十七方五分每方實給銀八分一釐共該土方銀二萬七千九百二十三兩七錢三分零行據河北道朱藻冊詳前來臣等覆核無異因係緊要工程除一面先行動支管河道庫河銀給發該廳分委幹練河員興工僨挑務於伏汛前完工俟河水大長乘機開放并飭委河北道朱藻監工督催仍照例

請於司庫內撥帑還項並將原冊送部查核外  
相應會同河東督臣田文鏡江南河臣孔毓  
珣合詞恭疏

題估伏乞

皇上睿鑒勅部議覆施行雍正八年三月二十二  
日

題奉

旨該部速議具奏欽此部議准行雍正八年四月  
二十一日奉

旨依議欽此

勘築祥陳二汛臨河月堤

題爲亟請加幫臨河月堤以資保障事該臣等會看得豫省黃河南岸祥陳二汛月堤因節年汎水長發沙淤卑矮先據管河道造冊詳請

題估加幫經臣嚴批查駁在案今查祥陳二汛月堤等工俱當臨河險要從前原有暫緩未修亦有節次加幫者但修守工程全在審視乎平險平則雖係卑矮之工可以暫緩險則

雖加幫數次仍應興修決不敢以不必加幫  
之工冒昧估修更不敢以已經加幫尙未准  
銷之工稽遲貽悞祇緣節年汎水長發直抵  
堤根水退沙停淤埋卑矮現在臨河北面堤  
身僅存四尺至六七尺不等一遇汎水漫灘  
之時在在有汕刷浸滲之虞若不亟爲加築  
高厚難資捍禦隨行該管道廳逐細確估去  
後茲據該道等詳稱遵查祥符縣南岸上下  
二汎月堤等工共長六千六百八十五丈應

普例加高二尺幫至頂寬三丈底寬十丈需用銀七千九百九十五兩一錢八分零又陳留汎南岸八九堡月堤二段工長三百八十三丈應普例加高二尺幫至頂寬三丈底寬十丈需用銀七千九百九十五兩一錢八分零又二縣月堤通共估用銀一萬三千五百三十九兩七錢一分零俱係據實估計並無絲毫浮

冒理合造具估冊詳請核

題等情前來

臣

等確勘復核無異因該工關係

省會爲大堤之重門保障甚屬緊要批飭在  
於河銀欸內先行通融動發銀兩乘時上緊  
僦築應請仍於司庫撥解還項并檄該道親  
詣監工督催外相應會同河東督臣田文鏡  
護理江南河臣康弘勲合詞具疏

題估伏乞

皇上睿鑒勅部議覆施行雍正八年五月十六日

題奉

旨該部速議具奏欽此部議准行雍正八年六月  
十二日奉

旨依議速行欽此



加修程家寨埽土

題爲詳報工程極險情形亟請邁埽鑲墊防風  
以禦黃溜以衛城社民生事該臣等會看得  
下南河廳屬祥符縣南岸下汛程家寨月堤  
地勢窪下逼近省城最關緊要雍正四年因  
河水泛漲於增估案內修做埽工長二百三  
十丈每年循例歲修加謹防護雍正七年自  
夏徂秋澍雨連綿八月內河水長發洶湧異  
常全河之勢趨向南岸大溜滾射該工埽外

水深一丈八九尺至二丈一二尺不等根底  
埽料朽腐不堪水勢搜刷情形極險先據該  
道廳造冊詳請

題估邁埽加鑲經臣嚴批查駁在案今查該工  
現在水勢上提大溜奔騰壩下水仍深一丈  
八九尺至二丈一二尺不等竊恐河性靡常  
伏秋踵至斷非單埽所能抵禦隨經批發銀  
一萬六千兩僱辦各料於七年十月內下埽  
加鑲抵禦凌汛又經飭令續辦料物於八年

正月內節次加鑲抵禦桃汛是已做工程凌  
桃著有成效其未做工程伏秋尤須經理應  
仍估邁埽二路照前鑲壓高寬惟相機籌度  
將下水頭長二十丈暫緩修做又於埽個每  
路減高一層共估工長一百八十丈邁埽一  
路三層二路四層計應下長十丈高一丈埽  
共一百二十六個普面加鑲長一百八十丈  
仍寬三丈高一丈三尺庶足以資捍禦而堤  
工可保無虞計邁埽加鑲工長一百八十丈

共估用料物夫工銀二萬二千四百四十三兩一錢二分茲據該道廳造冊詳請會核

題估前來臣等復核無異因該工逼近省城最關緊要批飭在於管河道庫存陽武大堤易工節省銀內通融動支先行酌發乘時辦料貯工相機修築除飭該道監工督催并將原冊送部查核外相應會同河東督臣田文鏡護理江南河臣康弘勲合詞具疏

題估伏乞

皇上睿鑒勅部議覆施行再照前項邁埽工程據  
該道廳冊估下埽二路套埽三層四層不等  
理應先行備齊料物堆貯工所聽用如伏秋  
二汛水勢稍平臣等再行相機減省以節錢  
糧餘剩料物留爲下年別工之用合併聲明  
雍正八年五月十六日

題奉

旨該部速議具奏欽此部議准行雍正八年六月  
十三日奉

旨依議速行欽此

防河奏議目次

卷四

恭報接印到任日期

恭報堵竣漫工

附紀

豫備各工歲搶修並上游料物

估築山盱束水堤工

廳員分管黃運工程

估計高堰山盱土工

建築清口挑水埽壩

附紀

挑濬駱馬湖下游六塘河

附紀

修濬文華寺閘下河堤

停止荊山水道工程

附紀

估計高堰山旰石工

歲加五寸堤工



防河奏議卷四

李參議奏為恭報接印到任日期仰祈

恭報接印到任日期

題為恭報微臣接印到任日期仰祈

睿鑒事竊臣欽蒙

皇上天恩

特命臣以吏部尚書管理南河總督印務臣隨遵

旨將河東河道總督印信於雍正八年五月二十

五日委員賁交河東督臣田文鏡掌管并自

起程緣由具疏

報在案今於六月初九日行至江南清河縣  
地方准護理江南總督河道印務管理河庫  
道叅議兼管淮徐道事康弘勲差委裏河同  
知夏建德華蕩營叅將劉延廣等賞送

欽頒總督江南河道關防一顆

王命旗牌十桿面副

聖諭廣訓漢字書一本

御製朋黨論清漢書二本

上諭一卷恭錄

上諭六本硃字

上諭一卷人臣儆心錄一套

上諭清漢書十一本

御賜瑞穀圖一幅

上諭一本

御賜覺迷錄一部未用火牌十七張并書吏文卷  
等項到臣臣隨恭設香案望

闕叩頭謝

恩接受於雍正八年六月初十日到任其河工一切修防應行事宜容臣查明另疏具

題至

欽部案件遵照定例展限完結外所有微臣接印到任日期理合恭疏

題報伏乞

皇上睿鑒施行雍正八年六月十一日

題奉

旨該部知道欽此

恭報堵竣漫工

題爲恭報河湖水勢消落漫工堵築完竣據實  
陳明仰慰

聖懷事雍正八年七月初三日奉

上諭據河道總督嵇曾筠奏稱六月二十六七等  
日風雨連綿晝夜不止東省蒙陰沂州鄭費滕  
嶧各地方山水暴發直注邳州猫兒窩迤下并  
荆山口上接微山昭陽諸湖之水一時匯聚於  
駱馬湖激成過額在山之勢溢入運河漫入黃

河浮堤越岸奔騰南注匯歸洪澤一湖據邳州宿遷桃源一帶沿河官員陸續詳報相同臣已飛飭該道廳等星赴漫溢處加謹保護一面親赴高堰將天然二壩滾水三壩督率開放以洩異漲現今黃運湖河水勢方定淮揚居民安堵其邳宿各工過水之處現有露出崖岸已嚴飭各廳汛裹頭保護無使蔓延等語覽奏甚爲駭愕今年春夏之交北方雨澤畧少朕卽慮夏秋之間雨水必多屢諭河臣加謹保護工程以防

伏秋之汎今觀湖河漲溢情形有非人力所能  
捍禦者朕惟有修省戒懼以凜

上天示儆之深恩更念邳州宿遷桃源等處水勢驟  
長禾稼室廬必遭淹沒深可憫惻著差往江南  
清查錢糧之侍郎馬爾泰彭維新御史安修德  
等星赴被水地方動支藩庫銀數萬兩速行賑  
濟其應行帶往散賑之員著馬爾泰等遴選廉  
幹者帶往分派各處會同地方官悉心辦理勿  
稍稍遲勿令遺漏務使窮民人人安堵寧居咸

得其所其被災之處今年額徵錢糧著悉行蠲  
免倘有已經完納者准作明年額徵之數聞山  
東水發之處民間田舍亦被損傷著巡撫岳濬  
遴選賢能官員前往查勘動支庫銀速行賑濟  
勿使一夫失所其應行蠲免錢糧之處著一併  
確查奏聞請旨欽此欽遵竊惟今歲伏汎水勢  
安瀾嗣因秋雨連綿東省山水暴發一時匯  
聚於駱馬湖盈堤越岸溢運浮黃奔注洪澤  
以致各工在在報險經臣



奏明蒙

聖主愛民念切大沛

恩綸四野蒸黎歡聲雷動通工員弁感激難名臣  
與蘇州撫臣尹繼善悉心商酌往來各工督  
率搶護竭蹙料理仰賴

皇上至誠昭格黃運各工水勢消落或沙淤掛口  
或截閉斷流俱各化險爲平其水勢湍急如  
宿虹廳屬之孟誠菴朱衣城外河山安廳屬  
之沈家圩陳家社等處漫工臣等親身督率

星運料物調集弁兵相機進埽俱於八月初  
八初十三等日合龍告竣所有上下中河  
間段殘缺堤工現在修補回空漕船毫無遲  
悞淮揚一帶運河因閘壩宣洩水勢平穩高  
堰大堤蒙我

皇上智炳幾先發帑帑築雖湖水盈滿足資捍禦  
幸保無虞現在濱河兩岸城郭人民依然安  
堵堤堰埽壩次第完工詢之年老居民僉稱  
今秋水勢甚大而旋即沙淤掛口從未有如

此神速等語皆由我

皇上慎重河防如傷在念一

聞民罹水患卽荷

恩膏飛下蠲賑弘施比之堯咨舜敝已溺已饑更  
爲迫切而

精誠所感呼吸可通所以偶逢水漲而一過卽消  
尅日施工而旋經奏績億萬兵夫百姓異口  
同聲莫不頌

聖主之至德深仁奠清寧而贊化育實有潛移默

契非人力之所能爲也今次湖河漫溢各工  
道廳營汛員弁雖經竭力搶救星速堵築合  
龍未曾奪溜但疎防之咎實所難辭應將各  
職名分別造冊另行咨部聽候查議所有堵  
塞漫工以及修復各堤錢糧據淮徐淮揚兩  
道冊呈共計銀三萬八千二百餘兩臣等復  
核備造細冊另行咨送統聽部議責令分賠  
至臣等忝膺河務不能防患於未然適遇山  
水驟漲堤岸漫溢以致上厪

宸衷實屬奉職無狀均祈

勅部議處

臣

等愧懼交深悚惶無地惟有益加敬

謹協力齊心將一切事宜詳確商酌辦理務  
期永慶安瀾以仰報

聖恩於萬一也所有水勢消落漫工堵竣情形

臣

謹會同蘇州撫臣尹繼善合詞恭疏具

題伏祈

皇上睿鑒施行雍正八年八月十三日

題奉

旨據河道總督嵇曾筠等奏稱黃運兩河水勢消  
落其湍急諸處竭力修築於八月初八初十十  
三等日俱已合龍告竣所有上下中河間段殘  
缺堤工現在修補回空漕船毫無遲悞其高堰  
大堤因今年奉旨發帑幫築是以湖水雖大足  
資捍禦幸保無虞兩岸居民依然安堵父老僉  
稱今秋水勢甚大而旋卽沙淤掛口從未有如  
此神速等語朕前聞湖河水勢漲溢附近地方  
罹於水患宵旰憂慮不釋於懷發帑遣官星馳

賑恤兼命河臣等竭力堵築務期早慶安瀾今  
水勢消落迅速計日施工卽能底績此皆

神明默鑒朕衷俯垂護佑故化險爲平奏功若此  
之速也朕心深爲感激着照上年之例敬謹致  
祭南河北河之

神以申報享之典祭祀應行禮儀着該部查明具  
奏所有疎防大小各員着免其查叅其修復各  
堤錢糧亦免分賠該部知道欽此

附紀

自古之言塞決者詳矣大概經時累月奏功  
不易假使河流漫缺或僅在一隅或水勢陸  
續加長司其事者縱不能防患未然猶及徐  
圖抵禦若乃各路山水陡發汪洋浩蕩平湧  
而來雖有智能無所措手此豈尋常人力所  
能堵築耶雍正八年七月東省山水異漲匯  
歸駱馬一湖湖不能容溢運浮黃河湖合一  
報漫缺者以數十計一時河工員弁稱諸練



者望洋心悸莫知所措

臣曾筠

初蒞南河方

巡閱各工未遍聞報卽於途次具摺以

聞一面親赴各要害處審形度勢籌所以捍禦之策行至桃源工次目睹夫滔滔之勢奔注洪澤乃恍然定計曰是不可不爲水謀一去路也遂策馬飛馳卽赴山盱周橋以南舉天然南北二壩創開百數十丈復委員盡啟高江寶一帶閘壩分流洩入江海譬如人之一身患脹滿者尾閭通利則疾去半矣會巡撫

臣尹繼善自蘇馳會宿邑相與寢食舟中口  
咨手畫鳩夫衆運料物躬率員弁分投堵禦  
仰荷

聖主恩綸飛下蠲賑頻施費以百數十萬計並舉  
本歲民間已完賦稅抵明年額徵凡自道府  
廳縣將備以下聞者靡不感繼以泣而兵夫  
百姓歡呼於河兩岸者聲如雷焉於是負簪  
秉鋤益踴躍奮興爭致其力與馮夷相搏而  
水勢亦遂日退沙淤掛口比比皆是且有

煩一夫不動一料而決口自合者咸詫爲奇  
異卽勢至險要如宿虹之孟誠莽朱衣城外  
河之沈家圩三處水亦旋消得以逆力堵築  
不彌月而竣事從來堵漫缺者每於霜降後  
視勢減方敢進埽未有若斯之神且速者信  
天功非人力也至今回憶斯時人盡張皇勢甚洶湧  
嚮非

皇上如天之仁挽回造化昭格

上穹則數十處漫工毋論積日月之久耗水衡之錢

不知凡幾而二麥失種民之薦饑者更復何如蒙我

皇上誠敬感孚洪施普被上契

天心水勢驟退閭閻安堵如故維時奉

命董賑務者侍郎臣馬爾泰臣彭維新御史臣安  
修德沿邨散給蔀屋均沾濱河諸州邑得蒙  
聖主之賜盡力於南畝不特河流奠定而民困皆  
賴頓甦然後知禦灾捍患誠能以至誠之心  
格

天則雖異漲如是不難立致又安天人相應顯而有

徵臣曾筠

與大小僚屬奔馳工次不過竭蹶

趨走未有尺寸之補廼蒙不加譴責

恩諭優叙益滋愧慙唯有感激奮勉倍存寅畏以  
仰報

國恩祈求永慶安瀾而已

預備各工歲搶修並上游料物

題爲

題明預備工料仰祈

睿鑒事竊照河工料物全在及時僭辦貯工濟用

方資修守

臣蒙

皇上天恩前在河南副總河任內

奏請每年八月內道庫發銀購料勒限十月照額辦足並請動支帑銀另行購料堆貯上游倘遇新生險工立即順流搬運以濟急用有

備無患仰荷

聖明俞允是以豫省歷年修防叨被

皇恩安瀾有慶今臣調任江南遍聞黃河自徐屬

之碭山以至山安海口兩岸綿長一千六百餘里堤埝工程非迎溜頂衝卽掃灣拖溜在在險汎如同鱗集兼之邳宿桃中高堰淮揚一帶湖河工程攸關運道民生均屬緊要每年歲搶以及新險費帑數十萬兩需料億千萬束方能敷用從前河臣每年除額運葦營

蕩柴一百五十萬束之外俱於河庫通融發帑於年前預給辦料銀兩購貯料物但所備之料不過十分之二三工多料少分貯難週一遇水勢長發購辦維艱緩不濟急且查江南柴束產自海口一帶守候風信挽運更延時日若非先事豫圖恐致臨期坐悞以臣愚見請照豫省之例每年於九十月內卽預爲約計各廳來年需用之料通融動支銀兩預備十分之七酌量工程險易分貯各工限以



本年十一月內運工一半次年正月內務令全運到工其餘俟次年視工程之緩急再行辦運實爲妥便所有各廳承辦料物責令道員嚴催照限辦運貯工詳委就近州縣盤查出結備案如有虧少及辦不足數該州縣據實揭報由道查明卽將該廳以侵蝕錢糧例揭報嚴叅倘委盤之員扶同瞻徇其短少物料仍照盤查倉庫之例責令分賠該道如有瞻徇情面不行據實揭報一經查出將該道

照狗庇例一併叅處再各廳緊要工程處所  
除前預備歲搶料物之外再酌發銀三萬兩  
亦照豫省之例每年辦料堆貯上游遇有新  
險卽可星飛協運濟用如無新險工程卽准  
入於次年歲搶工程動用仍於酌發下年預  
備料物銀內照數扣銀發給另行購易新料  
堆貯上游庶得年年有備無患如此則辦運  
及時料物充足修防得以緩急有濟更可預  
爲稽查清楚一舉數善實與工程錢糧大有

裨益除照例通融河庫存銀動支預辦外臣  
謹會同蘇州巡撫協理河工事務臣尹繼善  
合詞恭疏

題明伏乞

皇上睿鑒施行雍正八年九月二十九日

題奉

旨該部議奏欽此部議准行雍正八年十二月初  
二日奉

旨依議欽此

佑築山盱束水堤工

題爲遵

旨議奏事該臣等看得滾水壩下南北兩岸束水  
堤工荷蒙我

皇上軫念蒼黎誠恐天然等壩洩出之水溢浸田  
廬

特命前河臣孔毓珣相度動帑於壩下修築束水  
堤工爲保衛民生之計當經前河臣

奏請將南甸以下王家巷等處改濶另築新堤

一道其南北兩岸堤尾各建築新堤一道再將南北兩岸舊堤按其段落分其平險遞爲增減一律加高培厚俾兩堤夾束水勢湍流自無旁溢之患接准戶部咨開大學士等議覆應如所議令該督動支河庫銀兩遴委賢員卽速將堤工分段修築尅期告竣堤成之後交與地方官選殷實老成之人令充堤長遇放壩之時率領附近居民輪流巡邏防護閉壩之後仍令民間照例修補地方官會同

河官看驗并嚴禁豪強包攬胥役勒索等弊  
其修築丈尺及需用銀兩完工之日造報工  
部核銷等因奉

旨依議欽此欽遵移咨到前河臣准此當經轉行  
遵照動支河庫銀兩遴委幹員分段修築去  
後續准工部咨開准戶部咨照相應行文將  
前項應築應幫各工丈尺及需用銀兩細數  
照例據實確估造冊具題等因亦經前河臣  
轉行遵照確估造冊詳報嗣據淮揚道白鍾

山詳稱遵將滾水壩下改濶加幫南北束水  
兩堤並堤尾接築新堤細加丈量共工長一  
萬九千六百五十六丈逐一確估共用土方  
銀一十萬五百一十八兩一錢六分零造冊  
詳送核

題等情經前河臣孔毓珣核明照數動支河庫  
部撥鹽課銀兩分派各員僱築委淮揚道監  
工督催在案臣到任後卽值湖水盈漲將山  
肝各壩開放宣洩壩下一帶新築堤工雖間

有被水汕刷然藉以束水歸湖順流東注此  
誠我

皇上洞燭機宜先事預圖之明驗也日今各壩已  
閉現在飛飭該道查明將被水汕刷以及雨  
淋殘缺之處逐段挨查責令承修之員上緊  
僦築俟一律完竣之後卽將用過銀兩核實  
題銷一面交與地方官選殷實老成之人令充  
堤長嗣後遇有放水之時率領附近居民輪  
流防護閉壩之後仍令民間照例補修地方



官會同河官看驗並嚴禁豪強包攬胥役勒索等弊理合先行會核

題估除原冊送部查核外臣謹會同蘄州巡撫協理河工事務臣尹繼善河東總督掌管北河總督印務臣田文鏡合詞恭疏

題估伏乞

皇上睿鑒勅部議覆施行雍正八年十月二十九

日

題奉

旨該部議奏欽此部議准行雍正八年十二月十

九日奉

旨依議欽此

廳員分管黃運工程

題爲廳員管轄黃運兩河難於兼顧

請將工程酌量調管以專修守事該臣等看得江南黃運兩河工程關係運道民生設官分職必須因地制宜庶便隨時修守若駐劄寫遠不無鞭長莫及之慮查前河臣孔毓珣以邳睢宿桃宿虹三廳所管汎地工程黃運交錯兼顧難周

奏請分調管轄接准部覆應令該督會同尹繼

善會題到日再議等因奉

旨依議欽此欽遵到前護河臣康弘勲移交到臣

臣蒞任後同撫臣尹繼善於查看邳宿工程之時相度機宜公同商酌查邳睢同知一員所管黃運兩河工不綿長路不寫遠照管甚易所有邳睢同知舊管黃運兩河工程似毋庸更改惟宿虹同知所管黃河兩岸一百四十餘里險工林立若再兼管運河實覺難於策應又宿桃中河通判所管中河兩岸子堤

二百五十餘里既屬綿亘又兼管黃河葉家莊寶家林等工照應亦甚難周應將宿虹同知一員令其專管舊管黃河兩岸一百四十餘里并宿桃中河通判舊管之黃河葉家莊寶家林等工歸併宿虹同知一並管理其宿虹同知舊管運河兩岸堤工共長四十八里零應改歸宿桃中河通判管理其宿桃中河通判舊管中河兩岸子堤共長二百五十餘里若仍令照舊全行管理又難兼顧應自宿

遷至古城運河兩岸子堤共長九十餘里連  
歸併宿虹之運河兩岸工程四十八里零俱  
令宿桃中河通判管理將該廳改爲宿遷運  
河通判以專其責至宿桃中河通判舊管古  
城以下至三岔運河兩岸子堤計長一百三  
十餘里查有安清中河通判一缺原管運河  
自桃源三岔起至清河縣楊家莊止兩岸子  
堤不過五十餘里又管運鹽中河一道自運  
口鹽河閘起至安東縣止道路雖長其緊要

工段俱在運河兩岸五十餘里之內應將古城至三岔一帶運河兩岸子堤工程歸併安清中河通判管理將安清中河通判改爲桃源安清中河通判以專其責如此分調管轄實於工程大有裨益再臣等更有請者山安外河揚河三廳所管黃運兩河工程俱各綿長二百餘里險工林立亦難兼顧查有海防同知駐劄廟灣並無緊要工程應將外河廳南岸工程之內自新港工頭起至山安交界

陳家社止計工長一百五里六分零又山安  
廳南岸工程之內自陳家社起至陸家社竈  
工堤尾止計工長六十一里八分二共工長  
一百六十七里四分零分歸海防廳移駐童  
家營適中之處就近管理仍可兼管沿海各  
州縣墩臺并海鹽二州縣蝦鬚二溝河道請  
將該廳改爲分管山安南岸河務海防同知  
又查江防同知駐劄瓜洲止管江口并三汊  
河迤南河道二十五里所管地方甚近應將



揚河廳工程之內自邵伯迤北高江交界三十里舖起至三汊河止兩岸各工長八十里分歸江防廳管理請將該廳改爲揚河江防同知自此分界之後則外河廳所管工程自高家灣起至新港工頭止計工長一百四十九里零山安廳所管工程自四舖溝起至六套堤尾止計工長一百九十五里零揚河廳所管工程自黃浦起至邵伯迤北高江交界三十里舖止計工長一百三十九里九分工

段既屬停均修防亦易照應再查分歸海防  
廳之新港工頭起至葉家營止工長六千零  
二十七丈六尺原屬外河廳屬之上河汛內  
工程今既歸海防廳分管應請添設巡檢一  
員把總一員令其管理其上河汛內舊管工  
程除分歸新設巡檢把總管理外尙存工長  
二千八百六十九丈七尺應仍令舊管汛員  
管理庶各有專守而修防不致貽悞矣再查  
各廳既分調工程關防必須更換宿桃中河

通判應換給淮安府分管宿遷運河通判字  
樣關防安清中河通判應換給淮安府分管  
桃源安清中河通判字樣關防海防同知應  
換給淮安府分管山安南岸河務海防同知  
字樣關防江防同知應換給揚州府分管揚  
河江防河務同知關防其童家營新添巡檢  
一員應請鑄給童營司巡檢印信庶分管地  
方與關防字樣脗合而各員之職守分明復  
行據淮徐道副使呂維炳淮揚道僉事白鍾

山各詳議前來與臣等查核無異除新添巡檢一員把總一員俟奉

旨允准之日容臣等揀選分別咨

題補授再照沂鄒海贛同知一缺經管山東沂州鄒城縣并江南海州贛榆縣河道工程因該員駐劄山東鄒城縣之大興鎮是以分隸北河但所管鄒城縣禹王臺工程端爲抵遏沐水不使滙歸江南之駱馬湖而設修防職守攸關綦重請將該員舉劾事宜應聽河東

河臣并臣衙門一體考察臣謹會同蘇州巡撫協理河工事務臣尹繼善合詞具

題伏乞

皇上睿鑒勅部議覆施行雍正八年十一月初八

日

題奉

旨該部議奏欽此部議准行雍正九年三月十五

日奉

旨依議欽此

估計高堰山旰土工

題爲恭謝

天恩事雍正七年十一月二十四日准工部咨開  
都水清吏司案呈雍正七年十一月初五日  
工科抄出江南總河孔毓珣題恭謝調補江  
南河道總督一案奉

旨朕思治河之道惟有使黃水暢流無所壅滯則  
永慶安瀾然欲使黃水無所壅滯必須保固高  
家堰堤工使清水力能敵黃且以助其暢流之

勢則河工永遠無慮是高堰堤工關係最爲緊要從前齊蘇勒雖將石工稍加幫修而朕以爲不若多費帑金於堤工險要之所及單薄之處俱加修石工務令堅固高厚以爲久遠之計庶於河道民生大有裨益前孔毓珣在京陛見時朕以此諭之伊亦深以爲然又曾將治河之道降旨詢問田文鏡而伊之所奏與朕意不謀而合可見高堰堤工乃必應加增修理者也着發戶部帑銀一百萬兩交與孔毓珣尹繼善等畫

相度有應行預備料物之處卽於歲內採買早  
爲預備再着汪瀝對琳張坦麟吳昌祚前往淮  
上協同河臣等悉心辦理該部知道欽此相應  
行文江南總河孔毓珣仍轉行知照蘇撫尹  
繼善一體遵照

旨內事理遵行可也爲此合咨前去欽遵施行等  
因到前河臣准此當經檄行遵照去後今據  
淮揚道僉事白鍾山詳送高堰山盱幫戩土  
工估冊到臣據此該臣等看得高堰山盱二



廳一帶石土堤工捍禦洪澤全湖巨浪保護  
淮揚二郡民生蓄清敵黃利漕濟運最爲緊  
要仰賴我

皇上聖神天縱洞悉全河關鍵

特發百萬帑金務令加修高厚以爲久遠之計此  
誠千百世未有之功億萬年無疆之業也前  
河臣孔毓珣當卽行令淮揚道將石土工程  
逐細確估並節次發帑分委承修各員一面  
幫築土工一面造船分赴各山採辦石料臣

蒞任之後復經疊檄嚴催辦石各員作速運料開工適值今夏六七月間汎水驟長是以挽運維艱除現在委員押催陸續僱運開工另取估冊核

題外茲據該道詳稱修砌石工必先於工外建築越壩攔水然後可以施工今小黃莊迤南湖面寬濶水勢浩大每遇風浪勢若排山一壩孤懸安能抵禦再四思維惟有借舊石工連土留寬二丈暫爲外障以代越壩卽於後

身堤面開槽釘椿砌築石工俟新工築定根基再將舊工拆起選石添建方資捍禦但於堤面開槽則舊堤單薄應先於堤後幫築裏戩加培寬厚以還舊堤再堤內多有積水坑塘應填墊馬路以便取土今查高堰廳屬自六堡起至小黃莊止應幫戩堤工長三千四百九十六丈六尺八寸又自小黃莊起至高良澗禹王廟前止應幫戩堤工長二千四百七十四丈九尺八寸共工長五千九百七十

一丈六尺六寸連填墊馬路共估用土方料  
物銀一十萬六千二百五十六兩五錢七分  
零山旴廳屬自高良澗禹王廟前起至古溝  
東壩北止應幫戩堤工長三千三百五十六  
丈七尺四寸又自古溝東壩南起至滾水北  
壩止應幫戩堤工長五百八十丈八尺九寸  
共工長三千九百三十七丈六尺三寸連填  
墊馬路估用土方料物銀七萬九千二百二  
兩一錢三分零以上高堰山旴二廳應幫修

堤工共工長九千九百九丈二尺九寸共估  
用土方料物銀一十八萬五千四百五十八  
兩七錢一分零並無浮冒所有幫餞土工理  
合造冊先行詳送

題估等因前來臣等親勘復查無異除原冊送  
部查核外相應會同蘇州巡撫協理河工事  
務臣尹繼善河東總督掌管北河總督印務  
臣田文鏡原任內閣學士臣張坦麟原任戶  
部右侍郎革職臣汪滌通政司右通政臣吳

昌祚御史管坐糧廳事在任守制臣程仁圻  
合詞具

題伏乞

皇上睿鑒勅部議覆施行雍正八年十一月十八

日

題奉

旨該部議奏欽此部議准行雍正九年二月十四

日奉

旨依議欽此

建築清口挑水埽壩

題爲亟請建築挑水埽壩以保要工以衛運道  
事該臣等看得清口西壩爲黃淮二瀆交匯  
之區全河門戶攸關綦重康熙三十八年恭  
遇

聖祖仁皇帝南巡閱河駐蹕該工相度河勢親定方  
所

命立椿建壩挑水北入陶莊引河清水暢流黃水不  
致倒灌迄今民人稱壩爲

御壩椿爲

御椿歷年修守已久近因對岸長出淤灘比前形勢迥不相同入秋以來異漲洶湧大溜南趨衝厓刷岸以致大壩迤下一帶堤工直接清口西束水壩之後尾悉成頂衝之區水勢盤旋洄洑甚屬危險前據該道廳稟報到臣經臣於八月十六日自宿遷工所合龍告竣之後由黃河東下乘夜駐宿堤頭一面飛撥料物接濟該工一面率領員弁相度機宜於



御椿亭大壩雁翅之下接築埽工長九十五丈上護壩工下衛堤岸並於工尾接建挑水壩一座計長十丈下築雁翅長三十丈挑溜開行誠恐大溜復迴又接前工再建挑水二壩一座計長十丈並築上下雁翅長六十丈又於雍正二年黃河澄清蒙

皇上致祭

河神建造

御碑亭前再築挑水三壩一座計長十丈並築上

下雁翅七十五丈再接前工建築護厓埽工  
長九十八丈四尺所下埽工一帶魚鱗順埽  
中間間段築壩挑開大溜歸入中泓既順水  
以護厓復迎流而挑溜使其工段聯絡形勢  
互倚節節順挑重重捍禦實與

御椿亭相爲表裏共資鞏固伏念該工前蒙

聖祖仁皇帝指授修建更蒙

皇上法

祖敬

天爲民防河於

御壩一帶工程

特諭前河臣孔毓珣預爲籌畫仰見我

皇上丕顯丕承大孝大德永垂千古

臣等欽承

聖諭時刻敬謹留心緣值今秋大水一時衝刷至

險至緊

臣

等率領員弁星夜儻辦一律平穩

現今大壩巍然雙亭輝映長堤完固運口深  
通清黃滙合和流並濟循軌朝宗安瀾有慶  
在工員弁兵民莫不歡呼踴躍頂戴

皇仁茲據該道確估各壩埽個鑲填共需工料銀  
三萬九千七百七十一兩六錢三分零造冊  
呈送前來臣等復核無異因係緊要工程除  
照例先行動支部撥鹽課銀兩給發該廳購  
辦各料上緊興修儻築完固並行准揚道白  
鍾山監督及原冊送部查核外臣謹會同河  
東總督掌管北河總督印務臣田文鏡蘇州  
巡撫協理河工事務臣尹繼善合詞恭疏

題估伏乞

皇上睿鑒勅部議覆施行雍正八年十二月初八

日

題奉

旨該部議奏欽此部議准行雍正九年四月初二

日奉

旨依議欽此

附紀

修防之有埽壩乃救險之急務也然而工有  
首險次險之不一則埽壩亦有長短大小之  
不同勢尙可緩而率舉大工則爲妄費時非  
得已而因循不斷則又每致悞工唯斟酌夫  
時與勢之必行者而行之斯爲至當而不易  
雍正八年秋曾筠自宿遷堵築漫工竣事由  
黃河東下沿流審視方有事於善後之舉至  
清口西壩以上則見對岸沙灘日漸加長逼

溜南趨堤根直受衝刷自

聖祖仁皇帝御壩迤下直接清口束水西壩之後尾  
一帶堤工悉成頂衝首險非建壩挑溜別無  
搶護之策誠時與勢之亟不容緩者也躬率  
道廳親加相度先爲之測探水勢詳閱溜頭  
以定築壩之基址繼則熟視溜之大勢必挑  
出若干丈以外方可開行以定壩身之寬長  
埽筒之大小雁翅之長短又恐挑行之溜去  
而復迴再於所建頭壩之下離數十丈建挑

水二壩接連再挑又恐二壩之下溜仍不能  
遠去更建挑水三壩至順勢開行而後止其  
三壩相隔之中間接排雁翅順埽連比節節  
開挑重重捍禦以至下埽之層次路數椿樑  
繩纜高下尺寸莫不一一詳究計筭靡遺蓋  
如此則雖有洶湧之勢而防之既密無隙可  
乘將見水之暴者以馴怒者以息順流而下  
不復肆其冲囓矣相度既定卽飛調兵夫僨  
運料物遴委將備中之熟諳椿埽者專司其



事刻期興築不三月而竣工舉一時之至險  
至緊者順勢循軌遂致又安伏念

聖祖仁皇帝睿謨指示興築挑水大壩一座逼黃溜  
北注陶莊引河俾清水暢出至今二瀆合流  
貽萬世之利我

皇上敬

天法

祖萬幾之暇

歷念斯工 曾筠 欽奉

諭旨遵循舊章接築三壩易險爲平永資鞏固歸  
壩之所關鉅矣哉若夫魚鱗磯嘴小大異形  
沉水棲厓緩急異用上水下水之斜排雁翅  
係安危於尺寸逼水順水之盤築馬頭爭利  
害於微茫以及障廻瀾而象形扇而禦汕刷  
而鑲墊防風名以形殊用隨時異莫不各有  
至理存乎其間高談形勢者忽視而不詳求  
躬親操作者泥近而忘遠照必也詳覘全體  
大勢運籌於一心洞悉椿埽做法不遺乎微

末斯鉅細周知措施各當修防能事其庶幾

已

挑濬駱馬湖下游六塘河

題爲湖工亟循舊制水利先濬下源敬籌一得  
仰祈

睿鑒事竊照水性就下必須因勢利導俾脉絡疏通分路朝宗於海方可永慶安瀾伏查宿遷縣駱馬湖一承東省運河之水一承蒙沂諸山之水一承荆山口宣洩各湖之水滙爲巨浸且與運河僅隔一綫孤堤若蓄洩失宜易致壅積成患賴有湖之南岸洩水口門名十

字河引湖濟運兼以刷黃歷年久遠有利無  
患其湖之尾閘有六塘河一道以資宣洩歷  
宿遷桃源清河安東沐陽以至海州歸海嗣  
值湖水微弱誠恐黃水倒灌將十字河口門  
堵閉又於西寧橋迤西高阜之地建築攔湖  
堤壩因此湖水不通需資黃水濟運以致中  
河之水山劉老澗挾沙而下將舊有入海之  
路淤墊淺阻今秋東省山水暴漲合流而下  
全無去路浮溢堤岸關係匪輕臣等悉心籌

畫亟應將十字河口門仍復舊制俾駱馬湖  
之水流入中河制深運道兼敵黃流其西寧  
橋迤西攔湖堤壩酌量開寬俾湖水由六塘  
河迤下分流入海則上游有餘之水庶有歸  
宿不致壅滯浮溢如慮開放之後湖水或值  
微弱應於十字河口門建築草壩一座伏秋  
水盛開放暢流冬春水弱仍行堵閉其西寧  
橋迤西亦如前法建築草壩視水盈縮以爲  
瀦洩至六塘河迤下河身在宿桃境內者尙

屬流通在清安沐海境內者間段淤墊亟宜  
大加挑濬卽以挑河之土帶築子堰以資收  
束當經檄飭淮揚道白鍾山淮徐道呂維炳  
查勘確估去後茲據該道等議詳駱馬湖三  
合土壩之下頂衝中河廟灣頭埽工應改挑  
引河長六百一十三丈導水東注其六塘河  
至清河縣之朱家莊河分南北二股北股自  
清河縣朱家莊起歷沐陽至安東之謝家莊  
入碩項湖由海州龍溝義澤河入潮河歸海

應挑濬河長六千七百九十四丈南股亦自  
清河縣朱家莊起歷安東之蘇家蕩至沐陽  
之孟家渡武障河入潮河歸海應挑濬河長  
六千零八十七丈每方照例給銀九分約計  
共該土方銀五萬一千餘兩卽以挑河之土  
運於河之兩岸各離河十五丈外築成子堰  
約攔水勢導引朝宗所有宿桃安清海贛三  
廳應請加兼管水利職銜以便不時查察如  
有淤淺卽令該地方印官督同佐貳率令田



頭夫於農隙時隨加疏濬其挑河之土並可  
增培子堰將見河日寬深堰日高厚水勢暢  
流無虞壅滯舟楫通行漁鹽利涉由安東沐  
陽至邳宿一帶不惟河防攸賴抑且水利無  
窮等情前來臣復親詣該工詳看形勢審度  
機宜查核無異誠爲宣洩湖流要工民瘼河  
防急務爲此仰懇

天恩俯賜俞允開挑俾異漲之水得有宣洩則黃  
運河湖兩岸隄防均資鞏固矣除土方細數

俟春融水涸逐一確估造冊送部外臣謹會  
同河東總督掌管北河總督印務臣田文鏡  
蘓州巡撫協理河工事務臣尹繼善繪圖貼  
說合詞恭疏具

題伏乞

皇上睿鑒勅部議覆施行雍正八年十二月初十  
日

題奉

旨該部議奏圖併發欽此部議准行雍正九年四

月二十五日奉

旨依議欽此

附紀

考之禹貢淮沂其乂蔡沈集註載其川淮泗  
其浸沂沐是治沂者必兼治沐

曾筠

於禹王

臺築竹絡壩所以遏沐水之西流俾從故道  
由沐陽濫泥洪入海於竹絡壩附紀中言之  
詳矣但蔡註又載徐之浸莫大於沂沂又則  
自沐而下凡爲浸者可知是治沐者又必先  
治沂查沂水山蒙沂諸山千支萬派南至下  
邳會合荆山口所洩微山昭陽諸湖之水而

總滙於駱馬一湖湖之南岸有洩水口門名十字河乃中河未閘以前駱馬湖洩水入黃之徑中河既閘卽從此口引清濟運與黃水口門竹絡壩相對亦一清黃交滙處也中河橫亘其間形成十字故名十字河湖之尾間又有六塘河一道宣洩歸海嗣值湖水微弱於尾間西寧橋築三合土壩以塞其歸墟之路又恐黃水倒灌并將十字河口門堵閉另於王家溝迤上建閘引水以便啟閉惟是閘

基高阜水不能出運河水小之年轉資黃水  
由竹絡壩流入中河濟運以致劉老澗挾沙  
而下將湖之尾間六塘河舊爲歸海之道淤  
墊淺阻散漫民田六州縣咸病之雍正八年  
駱馬湖沂沐並漲水無去路汎濫爲患因有  
鑒於此遂決意開十字河并舉六塘河挑濬  
馬時屆嚴寒乘舡艫於湖蕩之間沿流溯洄  
遇淤墊不能行復舍舟而陸審地形水勢迂  
迴者取直之湧注者分濬之自宿遷直抵海

濱開明年更遴員張其智胡士圻等逐細確  
估分其任於所司州縣俾各經理疏濬於是  
駱馬湖歸海舊渠滔滔東注慶協朝宗而沂  
水之會合諸流以滙潴於駱馬湖者不復有  
汎濫之患矣蓋沂沭二水爲青徐巨浸合之  
則同挾其過賴在山之勢分之則各安其就  
下之性今沭則遏之沂則導之同於入海而  
各有其歸途庶有當於其父之肯也與是役  
也鮮不以爲力矯前弊意專主宣洩不知水

勢靡常旱潦不一前之人處湖水不足之時  
議堵築茲值湖水有餘之日議開挑其事不  
同其揆一也而況乎因時而用相機而行水  
大則開放宣洩水小則建壩潴蓄操縱由已  
節宣有制既無汎濫之虞且得濟運之益斯  
屬兩全無弊若以爲可蓄而常蓄之可洩而  
常洩之其治水也鮮不敗乃事豈獨駱馬湖  
然哉故備書之以告後之治河者



修濬文華寺閘下河堤

題爲遵

旨查議事雍正八年二月初八日准戶部咨開內閣交出大學士等議覆河道總督孔毓珣奏前事內開臣欽奉

聖諭淮安府城逼近河濱爾到任時可詳細相度城外堤工舊有石工卑薄者加修高厚無石工者建築石工等因欽此臣親赴淮城沿堤詳看查得淮安府城西門一帶乃係兜灣頂衝素

稱險要於康熙三十八年間建有石工長三百六十丈現在堅固其自西門以至南角樓止堤長二百二十丈水勢平緩非係迎溜之處是以當年止做柴土工程邇年歲歲修防臨河添下埽個堤身培薄增卑現在高寬堅厚足資保障似可不必再築石工伏查淮郡城西舊有護城河一道自運口迤下文華寺開起至白馬湖止計長八十餘里原屬分洩運河暴漲之水以保淮郡堤工並備曠乾之

時涵洞分達利濟西鄉田畝實屬緊要今河  
身淤墊堤埂日漸坍頽一遇開閘宣洩水無  
收束漫衍橫流西鄉一帶田疇悉被淹浸且  
暴漲之水宣洩不暢仍歸運河請將此護城  
一河再行挑濬深通并將兩岸堤堰加修寬  
厚凡值汎水暴漲卽將文華寺閘啟放以六  
分入運四分歸湖各循軌而去堤工自可鞏  
固約計挑濬此河淤墊並修幫兩岸殘缺卑  
矮堤工需銀三萬餘千兩等因奉

旨大學士議奏欽此 臣等查得淮城險要既有堅

固石工其柴土工程之處皆屬水勢平緩無容再添石工其自清口入運由惠濟閘折北而行至文華寺折東而至淮城每當淮水暢盛之時浩瀚之勢全賴支河旁洩以分其漲今孔毓珣請疏濬護城河從文華寺閘瀉出達於白馬湖以保固堤工應如所請速將河身淤墊之處卽行挑濬深通其兩岸堤堰加修寬厚飭令河官將文華寺閘座視淮水緩

急以爲啟閉其挑濬修幫銀兩於河庫動支  
工完之日造報可也爲此謹

奏請

旨雍正八年正月二十二日奉

旨依議欽此交出到部相應行文河道總督遵照  
議覆施行等因到前河臣准此當卽轉行遵  
照確估造報去後今據淮揚道僉事白鍾山  
詳送估冊到臣據此該臣等看得文華寺下  
引河一案經前河臣孔毓珣遵奉

諭旨親赴淮城沿堤逐一詳看因該處河身年久淤墊

奏請挑濬深通并將兩岸堤堰加修寬厚奉准部覆以挑濬加修銀兩於河庫動支工完之日造報奉

旨依議咨行到前河臣孔毓珣欽遵轉行檄飭河庫道動支部撥鹽課銀兩給發裏河同知夏建德僱夫價築挑濬委淮揚道監工督催在案續准工部咨行前項應行挑濬河身并加

修高厚各工丈尺需用銀兩照例確估具題  
等因亦經前河臣轉行遵照確估造報旋據  
該道冊估到前河臣孔毓珣尙未核

題

臣到任之後卽值秋汛水勢驟長臣相機飭

令將文華寺閘開放賴此河挑挖深通得以  
宣洩裏河工程保固平穩水落之後隨令堵  
閉並檄飭該道將各工逐一查驗修築並令  
再行核減去後今據該道詳稱遵卽逐段確  
估加修兩堤自鑼鼓墩起至洪家圩堤尾止

共長一萬六千七百七十七丈五尺挑濬河  
長四千八丈又撈白馬湖邊淤淺二十丈共  
實估銀三萬四千五百六十二兩二錢二分  
零造冊詳送核

題等情前來

臣

等復加查核無異理合會核

題估除原冊送部查核外

臣

謹會同河東總督

掌管北河總督印務臣田文鏡蘇州巡撫協  
理河工事務臣尹繼善合詞恭疏具

題伏乞



皇上睿鑒勅部議覆施行再照臣因出勘河工沿  
堤辦事難副定限業經臣

題明展限在案合併陳明雍正八年十二月十  
五日

題奉

旨該部議奏欽此部議准行雍正九年四月十二  
日奉

旨依議欽此

停止荊山水道工程

奏爲事關兩省民生工係全漕運道詳勘情形  
據實備陳仰祈

睿鑒事案准戶部咨內開前署山東撫臣費金吾  
奏請開挑東省河渠以洩濟寧等州縣滙入  
魚臺之積水因各州縣應開河道俱在江南  
必須查明出水處所會同疏濬等因經部議  
覆彭口以下河身非極寬廣今昭陽微山諸  
湖之水盡流入運倘雨水過多諸湖滙流而

下或致運河急不能容應令費金吾會同河  
東總督臣田文鏡北河總督臣嵇曾筠前署  
總河臣尹繼善詳確妥議具奏奉

旨所議甚屬妥協依議速行欽此欽遵移咨到前  
河臣隨經檄行兗寧淮徐兩道會同覆勘議  
詳欽遵在案竊惟興舉水利俾兩省沮洳俱  
成沃壤誠屬亘古未有之

隆恩但事關重大臣等仰承辦理必須通盤審慎  
事出萬全方可上副

宸衷今臣調任南河自邳宿上下以至桃清沐海各地方凡屬水道察其地形之高下河湖之遠近親身查勘除六塘河迤下歸海之道有關駱馬湖承上啟下之關鍵原係至要之工現在

題請疏濬外其自山東濟寧各州縣以至江南荆山口一帶疏導千支萬派之水一併下注南河關係重大實有難於舉行者伏查山東泉河原有本境歸海之路而湖稱水櫃蓄水

濟運以防旱暵設遇水勢過大汶濟以上則有鹽河馬頰徒駭諸河導流歸海其魚沛以下則由張谷山荆山口洩入駱馬湖與運河今山東上游蓄洩機宜尙有應行籌畫之處乃遽將各州縣故河積窪之水全注江南竊恐地處下游勢難容受况徐州黃河北岸李道華家樓接連蘇家山寬衍數十餘里向來不議築堤每黃水出漕漫灘之水從岡頭河十字河荆山口輾轉東注而荆山口橋下尙

留山麓坡陀勿使鑿闢深廣者誠恐黃水入  
運挾帶濁沙古蹟昭然良存深意今議開濬  
荊山口所有漫灘之水濁流併注淤墊堪虞  
卽使挑挖深通而微山昭陽諸湖之水合流  
而下誠如部議不入於運卽入於黃開濬之  
處甚有關係此江南水道上截之形勢也又  
自徐塘口三岔河迤下運河窄狹今再益山  
東河泉坡窪之衆水奔騰驟湧而來運河西  
岸以及邳州唐宋山格堤均難保固至運河

東岸湖中一線孤堤雖有馬莊萬莊減水石  
壩但增多減少萬一河湖通連則漕船繹道  
安能飛越況駱馬湖添納諸水自必倍加漲  
湧水勢高於黃運其患有不敢言者矣今秋  
山水驟漲仰賴我

皇上精誠昭格

天意潛孚是以驟漲之水雖溢入於黃河仍歸洪澤  
湖因此各工沙淤掛口旋堵旋竣遇此希有  
之事而水性靡常萬一全歸黃運誠如部議

諸湖滙流而下或致急不能容此江南水道  
中截之形勢也至駱馬湖旣承受諸山各河  
之水湖之尾間勢必宣洩不及且宿桃清安  
直至龍溝歸海計程綿亘自應一律加築長  
堤但兩省之水同歸并注安得有綿長千里  
之工程以資捍禦況沐邑又增沐水一道海  
州又有海潮上湧倘遇伏秋大汛河海相抵  
不能順下雖有高大之堤恐撞擊散漫六州  
縣之城社民田所關匪細此時山東水源未



閘已覺壅積爲患所以微臣現在

題請挑濬不過安其就下之性順其歸墟之勢  
所費無多卽以挑河之土培成子堰約攔水  
勢導引朝宗水大則聽其溢歸湖蕩可保相  
安無事若大閘來源滔滔浩浩遽恃新築之  
土堤可以約束恐水湧未能循軌此江南水  
道下截之形勢也今春該道等議估除山東  
另核外江南需帑銀三十餘萬兩伏念我  
皇上如天之德固不惜多費帑金然事必求其有

濟方可功垂永久臣蒙

皇上隆恩異數捐糜莫報如少有一得之愚而附和因循臣罪益滋難逭在前河臣孔毓珣據詳叅酌已屬躊躇未能遽議而微臣親身查勘積慮深思權其輕重相其緩急委屬未能舉行可否請停伏候

睿裁不揣冒昧謹備列情形據實

奏陳仰祈

皇上訓示遵行雍正八年十二月二十日

奏奉

旨所奏甚爲明晰應停止者該部知道欽此

附紀

仰惟我

皇上痼瘼民瘼已饑已溺凡臣工敷奏有關閭閻  
休戚者卽令舉行惟恐不及雍正七年署山  
東撫臣費金吾條

奏請將東省積水山江南荆山口宣洩歸海部  
臣議覆行令河東督臣南北河臣詳勘妥議  
時會筠總理北河卽遴員之諳練者分往查  
勘明年五月恭膺管理南河

恩命履任後舉江南境內上自徐邳下迄沐陽海  
州水道慎重詳審靡不躬親閱歷知其勢有  
必不可行者是年秋適遇異漲邳宿諸州縣  
胥羅水患幾爲運道憂究其來源俱由東省  
諸水滙注而下假令荆山口已貿然開闢不  
知更作何景狀矣曾筠旣遍涉諸川親加籌  
度何敢知而不言謹將上下形勢詳細縷陳  
仰蒙

乾斷卽准停止運道民生均被乂安夫欲舉魚濟

諸州邑歷有之坡窪積水一旦悉令歸海涸  
出膏腴之壤俾民耕鑿其意何嘗不善但積  
水之在東省已非一日其病小而江南急不  
能容其害大求利民而先病民所繫非輕旣  
病民而且妨運所繫不更重乎大小輕重之  
間尤宜深思而熟計之也

估計高堰山盱石工

題爲恭謝

天恩事該臣等看得高堰山盱臨湖一帶石工蒙  
我

皇上睿謨弘遠發帑大修不獨使洪湖之水得以  
暢出敵黃而淮揚一帶漕運民生永慶安瀾  
之福當經前河臣孔毓珣發帑分委承修各  
員一面幫築上工一面造船採辦石料臣蒞  
任之後復又疊檄嚴催幫戠土工前據該

道造冊估用銀一十八萬五千四百五十八兩七錢一分零臣等業經勘核

題估旋據各員俱已呈報完工現在飭令查勘另行造冊咨部外茲據淮揚道僉事白鍾山詳稱堰肝一帶石工欽奉

特旨發帑加修屢蒙檄飭查勘相度湖河水勢情形悉心確估加培高厚以垂久遠今除石工之內現在完整止須每年照例於石上鑲柴搶修足資捍禦無庸加修外其有間段底椿



腐朽石塊欹斜原屬順砌卑矮者應建築越  
壩拆修加高一律堅實又有年久風浪撞激  
灰縫剝落底樁腐朽歪斜脹裂傾圯者其中  
雖間有完整但向係順砌之工視裏甃石單  
薄若於舊石之上再加新石上重下虛勢難  
撐立應行通身全拆重修另換馬牙梅花等  
樁丁順間砌始能垂久至於新砌石工必先  
築越壩攔水然後可以興工今湖面寬闊水  
勢浩大一遇狂風巨浪力若排山一壩孤懸

安能抵敵工段綿長實難保護况查舊工根基椿空之內向經墊滿碎石今則舊椿難起新椿難下徒費人力不能施工惟有借舊石工連土留寬二丈暫爲外障於後身開槽釘椿砌石俟新工築定根基再拆舊石選用其舊工底石因新工灰汁未老應留二層以防風浪撞擊保護新工再清水潭一壩裏越未建石工今應一例創建以期鞏固所有高堰山圩二廳屬應行拆修并創建石工通共工

長六千三百四十二丈九尺四寸共估用料  
物夫工銀八十三萬二千三百九十一兩八  
錢五分零並無浮冒再查土石工程二項共  
計估銀一百一萬七千八百五十兩五錢六  
分零除部撥銀一百萬兩之外其餘銀一萬  
七千八百五十兩五錢六分零應在道庫存  
庫銀兩內動支給發理合造冊詳送會核

題估等情前來臣等親勘復核無異除原冊送  
部查核外相應會同河東總督掌管北河總

督印務臣田文鏡蘇州巡撫協理河工事務  
臣尹繼善原任內閣學士臣張坦麟原任戶  
部右侍郎臣汪漭御史管坐糧廳事在任守  
制臣程仁圻令詞恭疏具

題伏乞

皇上睿鑒勅部議覆施行雍正八年十二月二十  
日

題奉

旨該部議奏欽此部議准行雍正九年四月二十

二日奉

旨依議欽此

歲加五寸堤工

題爲欽奉

上諭事該臣等看得江南徐州以下一帶黃運兩河堤工荷蒙我

皇上聖明洞鑒念及額設河兵只能修補水浪衝激防備臨險搶護之用至於堤身一年之內風雨淋漓車馬踐踏恐漸至侵蝕欽頒

諭旨逐年加增仰見

聖主治益求治安益求安之至意經前河臣孔毓

珣

題請堤工去河甚遠現在高厚者可以緩其加  
修其頂衝迎溜勢甚險要風雨淋漓堤身卑  
薄之處先將統加五寸之錢糧詳細勘估加  
高培厚次年再以統加五寸之錢糧修次險  
之工再次年將可緩者一例增修以後總酌  
分緩急輪流加培庶堤身可冀一律高厚永  
資捍禦約計每年培修黃運兩河堤工需銀  
二萬八千餘兩等因部覆應如所題酌分緩

急輪流加增務使堤身堅固以資捍禦但江南黃運兩河工段繁多逐年題估題銷先後不一今欽奉

諭旨將堤工加高五寸該督題請輪流加增誠恐承修各官不無以上年已修工程捏作新修希圖冒銷等弊應令該督除每年歲搶修各工仍照例估銷外所有黃運兩河應行加高各工逐一確勘將地名工段高寬丈尺需用銀兩數目以及應動欸項據實分晰另行造



冊具題等因奉

旨依議欽此欽遵移咨到前護河臣康弘勲准此  
當卽轉行遵照在案今據淮徐道副使呂維  
炳淮揚道僉事白鍾山將所屬各廳黃運兩  
河應行加高培厚堤工通共估用土方銀二  
萬八千八百八十一兩九錢三分四毫二絲  
逐一確勘委無浮冒各造清冊詳送核

題前來臣等復加親勘查核無異除動支河庫  
銀兩給發各廳僱修并原冊送部查核外相

應會同蘇州巡撫協理河工事務臣尹繼善  
恭疏具

題伏乞

皇上睿鑒勅部議覆施行雍正八年十二月二十

二日

題奉

旨該部議奏欽此部議准行雍正九年三月二十

五日奉

旨依議欽此

防河奏議目次

卷五

題署淮揚道員缺

建築禹王臺竹絡石壩

附紀

開挑正人州引河建築夾江大壩

附紀

留工効力人員

設立堡房堡夫

豫撥鹽課銀兩

黃運兩河善後堤工

附紀

淮徐道員移駐宿遷

添設標營將弁整飭營制事宜

遵例自陳

添設河庫道俸工

建築四套月堤

挑濬鹽河

移建天妃石閘